

- 1 Dô dâht der herre Dietrich 'du bist in nôt erwigen:
ich hân es lützel êre, soltu nu töt geligen.
ich wil ez sus versuoohen, ob ich ertwingen kan
dich mir zeinem gîsel.' daz wart mit sorgen getân
- 2 Den schilt lie vallen Dietrich. sin sterke diu was gröz:
mit beiden sinen armen er Hagenen umbeslöz:
dô wart von im betwungen der vil küene man.
Gunther der vil edele darumbe trüren began.
- 3 Hagenen bant dô Dietrich unt fuort in dâ er vant
die edeln Kriemhilde, unt gap ir bi der hant
den küenesten recken, der ie swert getruoc.
nâch ir vil starkem leide dô wart ir liebe genuoc.
- 4 Vor freuden neic dem recken daz Ezeln wip:
'immer si dir sælec din herze unt ouch diu lip.
du hâst mich wol ergetzet nâch aller miner nôt:
ich sol ez immer dienen, mich enwendes der töt.'
- 5 Dô sprach der herre Dietrich 'ir sult in lân genesen,
vil edelin küneginne. ez mac vil wol noch wesen,
daz inch sin dienst ergetzet des er iu hât getân:
er sol des niht engelten, daz man in siht gebunden stân.'
- 6 Dô hiez si fûeren Hagenen an sin ungemach,
dâ er lac beslozen unt dâ in niemen sach.
Gunther der künec edele ruofen dô began
'war kom der helt von Berne? er hât mir leide getân.'
- 7 Dô gie im hin begegene der herre Dietrich.
daz Gunthers ellen daz was sô lobelich,
ern beite dô niht mære, er lief her für den sal:
von ir beider swerten huop sich ein ungefüeger schal.
- 8 Swie vil der herre Dietrich lange was gelobt,
Gunther was sô sere erzürnet unt ertobt
-wander nâch starken leiden sin herzevient was,
man sagtez noch für wunder, daz dô Dietrich ie genas.
- 9 Ir ellen unt ir sterke beide wâren gröz.
palas unde türne von den slegen dôz,
dô si mit swerten hiuwen uf die helme guot.
ez hêt der künec Gunther einen hêrlîchen muot.
- 10 Sit twang in der von Berne, sam Hagenen ê geschach.
daz bluot man durch die ringe dem helde vliezen sach
von eime scharpfen swerte, daz truoc her Dietrich:
doch hêt gewert Gunther nâch müede lobeliche sich.
- 11 Der herre wart gebunden von Dietriches hant,
swie kûnege niene solden liden solhiu bant:
er dâht, ob er si lieze ungebunden wesen,
daz si zwêne inne lande niemen liezen genesen.

8₃ starkes Leid hatte Dietrich Gunthern zugefügt durch die Bezwingung Hagens.